

Petersen Dyggve

I.

Je n'oi pieça nul talent de chanter,
pour ce n'i vueill metre m'entention;
a ciauz le lais qui chantent sanz amer
et qui d'Amours ne sevent que le nom.
Maiz par esfors ferai ceste chanson:
d'aventure iert sanz painne et sans penser,
et s'ele plaist ma dame, si la die,
c'onques chansons ne mi firent aïe.

II.

Teus blasme Amour qui la cuide loer,
faus trecheor, qui proient sanz raison;
chascuns se plaint de tolir et d'emblér,
qu'Amours a pris lor cuer en trahison.
Maiz je vous fi, dame, ligece et don
de tout le mien, que point n'en vueill oster.
tout l'ai leissié en vostre seignorie:
prenez m'avec, u je morrai d'envie.

III.

Amours me fait ma grant joie cuider;
Diex, si ne sai se je doie trouver
bele merci en la douce prison
u j'ai leissié mon cuer sanz raençon,
la merci Dieu, si ne m'en puet cuiter
cele quil tient a force en sa baillie,
par mon voloir: qu'a son gré n'est il mie.

IV.

Souvent m'estuet joïr et acoler
tel dont ne sai se je faiz mesprison,
car je ne puiz a mesure esgarder
ce dont il sunt devineor felon.
En devinant pensent que devison,
maiz ne lor vaut, bien lor savroie emblér
quanques je vueill, joie et hounour et vie,
s'Amours veinquoit ma dame com amie.

V.

Nus ne devroit ses valours oublier,
ne ses biaux ieuz, ne sa gente façon;

et quant je pluz pens a li ramembrer
si me merveill que nous tuit ne l'amom.
Or ai je dit outrage et desraison!
qui porroit, Diex, a tel cuer assener?
dont je l'aim tant, comment que m'escondie,
qu'a toute rienz m'est autre amours faillie.

VI.

Li cuens de Blois part en ceste chanson
se il aprent loiaument a amer:
quar d'Amours vient honors et compaignie,
et toute rienz qui a preudome aïe.

- letto 500 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/petersen-dyggve-41>